

四庫全書

史部

欽定四庫全書

史部

雲南通志卷十六下

詳校官給事中臣李臺

刑部郎中_臣許兆椿覆勘

總校官知縣_臣楊懋珩

校對官中書_臣朱烜

謄錄監生_臣仕士鵬

欽定四庫全書

雲南通志卷十六下

師旅考

附

文宗至順元年正月雲南諸王圖沁及萬戶布呼阿
固克酬等叛攻陷中慶路仁德府晉寧州等處托卜
嘉自立為雲南王布呼為丞相阿固呼喇呼等為
平章等官命中尚卿碩裕實以兵討之又以河南
行省平章奇珠為雲南行省平章入番順元宣慰

使特穆爾布哈為雲南行省左丞從豫王阿喇特
納錫哩由入番道進討四月烏蒙土官祿余殺烏
撒宣慰司官吏降於布呼羅羅斯諸蠻俱叛與布
呼相應平章特穆爾布哈被害四川行省調重慶
五路萬戶以兵來救軍至境值羅羅蠻萬餘人亦
遇害餘衆遁還事聞詔調江淞河南江西兵二萬
命諸王溫都斯特穆爾將之與湖廣行省平章托歡
會兵進討五月羅羅斯權土官宣慰撒加伯阿漏

土官阿喇勒州土官德益叛附於祿余時諸王圖
喇萬戶呼都克婁沙克呼博囉等皆領兵進討置順
元宣撫司統答刺斤軍並進又立雲南行樞密院
以哲爾特穆爾知院事塔瑪齊嘉琿為同知副使
發朵甘思圖沙瑪及鞏昌等處軍三千人付之四
川博囉亦以蒙古漸丁軍五千來會六月撒加伯
合烏蒙蠻兵萬人攻建昌縣雲南行省右丞伊爾
特穆爾拒之斬首四百餘級四川軍亦敗撒加伯

於蘆古驛七月圖沁布呼等勢愈猖獗烏撒祿余亦乘勢連約烏蒙東川芒部諸蠻謀令布呼弟巴延等兵攻順元詔遣使督豫王及行樞密院四川雲南行省亟會諸軍分道進討於是四川行省平章托爾楚兵由永寧左丞博囉引兵由青山芒部並進陳兵周泥驛及祿余等戰殺蠻兵三百餘人祿余衆潰遂奪其關隘以通順元諸軍尋又戰七星關六日凡十七戰賊大敗潰去時雲南行省平

章奇珠等俱失期不至十一月羅羅斯撒加伯烏
撒阿達等合諸蠻萬五千人攻建昌伊爾特穆爾
等引兵追戰於木托山下敗之斬首五百餘級仁
德府權達嚕噶齊克酬糾集義兵敗布呼於馬龍
州殺其弟巴延獻馘於豫王又戰於金馬山獲伯
忽及其弟巴延察爾其黨拜布巴巴延特穆爾等十
餘人誅之餘賊皆潰獨祿余猶據金沙江趣進兵
討之鎮西武靖王綽斯巴勒與伊爾特穆爾碩裕實

同進兵伊爾特穆爾倍道兼進奪金沙江十二月
綽斯巴勒伊爾特穆爾等擊敗阿禾蒙古軍於安寧
州禽阿固斬於軍前大兵抵中慶賊兵七千猶拒
戰於伽橋古壁口兵交伊爾特穆爾左頰中流矢
洞耳後拔矢復與戰大捷遂復行省諸軍皆會駐
於城中分兵追捕殘賊 二年正月哲爾特穆爾
博囉敗烏撒蠻兵射中祿余降其民烏蒙東川易
良州蠻獠等俱款附豫王至當當驛安輯人民三

月豫王與鎮西武靖王禽雲南賊首及諸將校悉
誅之磔屍以徇諸蠻悉降惟祿余追捕未獲四月
鎮西王等已平雲南各遣使報捷上言蒙古軍及
哈喇章羅羅斯叛者或誅或降雖已畧定其餘黨
逃竄山谷不能必其不反側乞分兵鎮遏餘皆遣
還從之九月祿余寇順元路左丞特穆爾布哈禦
之雲南行省遣都事那海奉詔往諭祿余授以叅
政祿余拒不受反為所害十月蒙古都元帥克呼

引兵擊阿固賊黨於靖江路海中山破其柵殺賊
五百餘人托卜嘉之弟必瑠圖袞達實舉家赴海死
又獲圖沁弟二人子三人誅之祿余遁去

順帝至正元年十二月雲南楚勒罕錫里等叛詔雲
南行省平章政事托克托穆爾討平之 二年十二
月賜雲南行省叅知政事布拉三珠虎符以兵討
斯可發 七年三月雲南王博囉來獻斯可發之
捷 二十三年三月蜀賊明玉珍自將三萬人攻

雲南梁王奔威楚求救於大理總管段功進兵

呂闔敗玉珍兵於闔灘江殺獲千餘級追至回澄

闔復至七星關皆大破之

元帝紀明玉珍陷雲南省治屯金馬山陝西行

省叅知政事徹爾特穆爾等擊敗之禽玉珍弟明二在二十二年

二十七年梁

王攻大理不克先是梁王忌段功殺之大理舊臣

仍立其子段寶梁王遣使刺之前後凡七攻不克

乃講和

明洪武十四年九月壬午命潁川侯傅友德為征南將

軍永昌侯藍玉西平侯沐英為副將軍列侯曹震
王弼金朝興都督郭英張銓等皆從征雲南授以
方畧師至湖廣友德悉遵上諭分遣都督郭英胡
海洋陳桓等率兵五萬由四川永寧趨烏撒友德
等率大兵由辰沅趨貴州十二月辛酉傅友德率
藍玉沐英等進攻普定普安俱下之進兵曲靖元
梁王巴咱爾幹爾密遣司徒平章達爾瑪將兵十
萬屯曲靖沐英曰彼謂我師疲於深入未有虞心

若倍道疾趨出其不意破之必矣友德然之遂進
師未至數里忽大霧四塞衝霧而行阻水則已臨
白石江矣頃之霧霽達爾瑪望見大驚友德即欲
濟師英曰亟濟恐為所扼乃整師臨流勢若欲渡
達爾瑪悉精銳扼江岸英別遣數千人從下流潛
濟出其後鳴金鼓樹旗幟達爾瑪急撤衆禦之陣
動英乃拔劍督師濟江以猛而善泅者先之長刀
蒙盾破其前軍敵氣索退數里而陣大師畢濟友

德麾兵進薄之矢石雨發聲動天地敵衆披靡遂
大敗生禽達爾瑪俘其衆數萬悉撫而遣之蠻人
大喜曲靖既平留兵戍其地友德自將北攻烏撒
以應永寧之兵分遣藍玉沐英率師西趨雲南癸
酉玉等至板橋梁王棄城走雲南省右丞觀音保
以城降玉等整衆入城撫定其民秋毫無所犯自
出師至是僅百日梁王在晉寧州固納砦赴滇池
死之傳友德自曲靖趨烏撒郭英等已出永寧攻

赤水河元右丞寶卜斂衆拒守友德兵至大破之
得七星關以通畢節又進至可渡河於是東川烏
蒙芒部望風歸附分遣諸將進取臨安諸路十

五年正月辛巳威楚路平章閻鼎瑪貝叅政埒克矩
布哈等赴曹震營降壬午曲靖宣慰司樞密同知
克呼該等及中慶武定澂江三路達魯噶齊等官
俱赴藍玉沐英營降遂置雲南都指揮使司以都
督謝熊馮誠署司事閏二月藍玉沐英等進攻大

理兵至品甸段世以兵五萬扼下關王等遣定遠
侯王弼率兵出洱水之東趨上關為犄角勢自率
衆抵下關造攻具夜半遣都督胡海洋由石門開
道遶出點蒼山後攀木緣巖而登樹列旗幟遲明
大軍望之踴躍謹誨敵衆驚亂英先驅渡河水沒
馬腹將士隨之斬關而入山上軍亦下腹背夾攻
世兵大潰進拔大理城獲世及段寶二孫乃分兵
取鶴慶畧麗江破石關下金齒於是徹爾默色和

尼平緬等處相率歸附 四月烏撒東川芒部復
叛傅友德檄沐英合兵進討大破其衆悉平之
九月土酋楊苴等以雲南城守空虛遂相煽叛糾
衆二十萬合三十六營兵攻城時城中乏食士卒
多病守將馮誠與指揮謝熊嬰城固守俟賊怠輒
出奇兵擊之賊不能破遂圍城為久困計沐英在
烏撒聞報馳回至曲靖先遣人報城中為賊所得
紹之曰總兵官領大軍三十萬至矣賊驚恐拔營

遁至安寧羅次邵甸晉寧江川等處據險樹柵英
至與馮誠等合兵剿捕斬首六萬餘級生禽四千
餘人諸部復定 十六年二月傅友德率郭英等
西討先是沐英自大理還故元右丞布延圖復叛
據佛光寨額森布哈陷鄧川高生圍雲南縣金齒土
官高大惠并額森呼圖克搆麓川夷入寇屠永昌友
德自七星關回兵率郭英等討之破佛光寨布延
圖自焚死遂過金沙江攻北勝府下之禽高生并

畧鄧川進平麗江平津等州蠻民降者數十萬戶
高大惠逃為白人所殺因置大理指揮使司以周
能守之麓川之外有緬國八百媳婦國皆內附於
是上遣耿炳文諭傳友德藍玉等班師留沐英鎮
雲南別命列侯王志仇成張龍分赴尋甸各府繕
城池立屯堡安輯人民 十七年四月以平雲南
功進封傳友德潁國公列侯藍玉仇成王弼子孫
世襲陳桓胡海郭英張翼皆為侯 十八年正月

東蘭州韋富及廣南特磨道復亂沐英討平之永
昌李觀亦討段酋平之十二月麓川宣慰司思
倫反率衆寇景東馮誠討之失利千戶王昇死之
十九年二月雲南臻洞西浦擺金擺榜諸蠻叛
復命傅友德率師討平之二十一年正月思倫
入寇結砦於摩沙勒沐英遣都指揮甯正擊破之
斬首一千五百餘級三月思倫悉其衆號三十萬
戰象百餘復寇定邊以報摩沙勒之役英選三萬

騎晝夜兼行凡十五日抵賊營遣都督馮誠先出奇兵三百挑之賊以萬人驅三十餘象逆戰指揮張因率騎卒五千餘人為前鋒其渠長跨巨象直前諸軍注矢連發矢中象左膝及脇象仆地渠長走追射殺之諸軍譟而前殺賊數百人獲一象而還英喜曰賊不足平也乃下令軍中置火銃神機箭為三行列陣中俟象進則前行統箭俱發不退則次行繼之又不退則三行繼之詰旦分軍為三

隊馮誠領其前甯正領其左都指揮湯昭領其右
將士皆鼓勇進賊悉衆出營結陣以待其渠帥把
事招綱等皆乘象象披甲背負戰樓若欄楯懸竹
筒於兩旁置短槊其中以備擊刺陣既交羣象突
而前諸軍擊之矢石俱發聲震山谷羣象股栗走
指揮張因千戶張榮祖率騎士乘之直擣其柵遂
縱火焚其寨煙焰張天還復以兵邀擊之殺傷甚
衆賊黨有錫喇者亦驍勇復率衆殊死戰左師少

卻英登高望之命左右取其帥之首來左師遙見
一人拔刀飛騎而下率衆更進英督戰益急不移
時賊衆大敗斬首三千級俘萬餘人生獲象三十
有七餘皆被矢如蝟死渠帥刁斯郎理各中百餘
矢斃象背上餘賊潰英率師追襲之賊連日不得
食死者相枕藉思倫遁去 六月東川蠻復叛命
傅友德為征南將軍沐英陳桓為左右副將軍曹震
葉昇為左右叅將討平之 九月越州土目阿資

反十一月阿資寇普安焚剗府治友德進擊之斬其渠滿己青二十二年正月阿資退屯普安倚崖壁為砦友德以精兵促之蠻衆皆緣壁攀崖墜死者不可勝計生禽一千八百餘人阿資遁還越州沐英使都督甯正從友德合擊大敗之斬其火頭弄宗等五十餘人阿資窮蹙請降初阿資之遁也揚言曰國家有萬軍之勇我地有萬山之險豈能盡滅我輩沐英乃請置越州馬龍二衛扼其衝

要人分兵追捕至是乃降 二十三年十一月思
倫降仍命為宣慰司 二十四年十二月阿資復
叛平羌將軍何福率兵討之至越州阿資援絕降
置寧越堡 二十八年正月阿資復叛西平侯沐
春平羌將軍何福禽斬於越州 三十年九月平
緬諸蠻刁幹孟逐宣慰司思倫倫奔訴京師命沐
春為征南大將軍都督何福徐凱為左右副將軍
率雲南四川兵討之 三十一年五月沐春進兵

擊平緬先以兵送思倫於金齒使人諭刁幹孟不從乃遣何福瞿能等將兵五千往討之福等躋高良公山直擣南甸大破之殺其渠刁名孟斬獲甚衆還兵擊景罕寨寨乘高據險堅守不下官軍糧械俱盡賊勢益盛福使告急於春春率五百騎往救之乘夜至怒江詰旦徑渡令騎馳躡寨下揚塵以警之賊乘高望見塵起蔽天不意大軍卒至驚懼率衆降春乘勝復擊崆峒寨賊夜潰走刁幹孟

乃遣人乞降上以其反覆不之許何福尋禽斬之
思倫始得還平緬悉定

永樂三年八百土酋入寇西平侯沐晟出次蒙自蠻
遁去督兵窮追斬其酋以徇 四年七月命沐晟
以左副將軍同新城侯張輔分道伐安南先是安
南國王陳日焜為其臣黎季犛所殺日焜之孫陳
天平奔愬京師季犛卑辭表請天平還國上遣廣
西都督黃中等送天平歸季犛伏兵殺天平中等

引還上怒遣將分道出師晟奉命由野蒲伐山通
道先驅入安南奪猛烈棚華關隘築堡駐師以造
舟分遣諸將出宣光江口舁舟夜至洮水汭流力
戰連舟為浮橋濟富良江與大軍會合攻多邦城
柵破之遂擣東西都及盤灘諸處師宗元江富
州維摩諸蠻叛指揮僉事沐昇皆以計禽之五
年五月張輔沐晟連敗賊兵所至如破竹黎季犛
父子走海上追至日南奇羅海口悉就禽械送京

師安南平得郡四十八縣百八十六戶三百十二萬五千九百遂置交趾各官晟還朝進封黔國公還鎮雲南 六年八月交趾酋簡定反命沐晟發雲南貴州四川兵數萬往征之仍命兵部尚書劉儵往贊軍事十二月沐晟帥師與簡定戰於生厥江敗績兵部尚書劉儵等死之 七年八月命英國公張輔與沐晟合兵討交趾獲簡定等檻送京師伏誅 九年正月命征夷將軍沐晟同副將軍

張輔討交趾陳季擴勅雲南及四川等省兵二萬
四千隨征季擴簡定所立偽王也 十一年十二
月沐晟與張輔合兵敗交趾賊於愛子江 十二
年正月沐晟等師至老撾三關執陳季擴以歸誅
之

宣德元年十二月命沐晟為征南將軍同安遠侯柳
升等由雲南分道進討交趾叛賊黎利

正統二年他郎甸蠻叛都督沐昂討平之 十月麓

川思任反思任思倫次子也宣德中與木邦相讐
殺因而失官改孟養宣慰司以刀氏代之宣慰使刀
賓玉勢弱不能輯諸夷思任遂擁衆叛於麓川侵
孟定灣甸大殺掠沐晟以聞至是復侵南甸州命
沐晟遣官招之不奉詔三年十二月思任掠騰
衝南甸取孟養地刀賓玉奔永昌死思任遂屠騰
衝據潞江仍自稱曰法法滇王號也事聞上遣刑部主
事楊寧諭之不服四年正月命沐晟率左都督

方政右都督沐昂討思任太監吳誠曹吉祥監軍
兵至金齒思任遣其將緬簡斷江立柵而守師不
得渡初思任未叛時刀賓玉常遣詣晟晟兒畜之
至是晟遣指揮車琳等諭之降思任佯許諾晟信
之無渡江意楊寧曰兵未加稱降詐也懼有後悔
晟不聽檄寧督餉金齒賊將緬簡數挑戰政怒造
舟六十艘欲渡江晟不可政不勝憤夜獨率其麾
下渡江擊緬簡追至景罕寨破其賊柵斬首三千

餘級獲象三十餘遂與其子瑛部將顧勇等乘勝
深入逼思任上江頃之伏四發政求救晟怒其違
節制不遣久之以少兵往至夾象石不進政追至
空泥兵疲食盡知晟不力援乃遣其子瑛還曰汝
急歸吾死分也遂策馬突陣死顧勇等一軍皆沒
晟聞敗會春暮慮瘴發燒江上積聚倉卒奔還永
昌至楚雄詔問失事狀晟懼罪暴卒思任犯景東
孟定殺大侯知州刀奉漢等破孟賴諸寨降孟璉

等長官司五月以沐昂為左都督征南將軍右都督吳亮為副將軍馬翔張榮為左右叅將進討捷於潞江 五年二月沐昂軍抵隴把去賊巢甚近張榮先令都指揮盧鉞擊賊大敗榮棄符驗軍器遁昂等不能救師還詔切責昂逮吳亮馬翔七月思任屯孟羅大掠據者章硬寨沐昂進克之賊宵遁威遠州土知州刀蓋罕戰威江亦敗之 六年正月命定西伯蔣貴為征蠻將軍總兵討麓川以

太監曹吉祥監軍兵部尚書王驥提督軍務侍郎
徐晞督軍餉時思任遣使入朝謝罪刑部侍郎何
文淵上言宜寬其天討大學士楊士奇是之英國
公張輔謂思任世職六十餘年屢抗王師釋此不
誅恐示弱小夷非策上從之侍讀劉球上疏諫請
罷麓川專備西北太監王振沮之不報遂命貴驥
先赴雲南復以副總兵李安叅將宮聚領川貴兵
副總兵劉聚叅將冉保領南京湖廣兵大發兵十

五萬轉餉半天下驥薦太僕寺少卿李贊郎中侯
璉楊寧主事蔣琳等為叅謀十一月蔣貴王驥等
至金齒分為三道進取會師上江夾攻三日不下
會天大風驥命縱火焚柵因督衆乘之斬首數萬
級賊衆敗走保南甸之沙木籠山為連環七寨驥
麾兵直入攻其中寨各哨俱奮大敗之十二月驥
等直搗巢穴進攻麓川積薪焚其柵思任乘舟走
緬獲其妻妾象馬寶玉無算子思機潛匿孟養移兵討

之捷聞詔驥等還會維摩州蠻韋郎羅作亂自稱
廣新王驥遣指揮萬斌擊之郎羅懼逃入安南驥
檄示福福安南人斬其首來獻驥等班師叙功進
封蔣貴定西侯王驥靖遠伯侯璉楊寧俱轉侍郎
餘陞賞有差 七年十月復命定西侯蔣貴靖遠
伯王驥征麓川緬甸先是思任既敗走緬大軍還
復出為寇復命驥等往征起兵如前 八年二月
蔣貴王驥軍至金齒遣使檄緬縛思任父子至軍

前仍進兵騰衝分遣沐昂侯璉等率東路兵徑搗
麓川以陳儀領前鋒三千開南牙山斷賊走路使
言緬願獻思任欲以重臣往取郭登請行由金沙
入緬緬酋卜剌浪來會頗驕蹇登折之酋氣沮乃
叩頭聽命十二月郭登還其國相緬剌劄以思任
載樓船來獻時有嫉登功者乃議留守沙壩剌劄
至貢章不見登遲疑不敢獻驥謂貴曰此給我過
江則絕我歸路也陳儀又自詫知天文以為瑩惑

犯輿鬼緬可伐驥乃密令蔣貴率師匝江而下大
戰一晝夜焚其舟數百艘剌劉竟持思任去貴子
雄追之兵敗自刎東路兵克孟養諸寨思機亦潛
竄獲其妻子象馬而已驥還仍以捷聞王振庇之
上慰勞如前加驥貴歲祿各三百石命楊寧叅贊
雲南軍務 十年十二月雲南千戶王政奉勅幣
諭緬甸許以孟養地易思任卜剌浪喜以思任妻
孥部屬三十二人付政思任不食垂死政遂斬首

函獻京師因以卜刺浪長子銀起莽為孟養宣撫
思任二子思機思卜尚潛居其地 十一年春改
麓川為隴川設宣撫司於隴把降勅赦思機等罪
令其來朝不至更命黔國公沐斌侍郎侯璉調緬
甸木邦兵討之至金沙江遣人招諭機疑懼不肯
渡江遂引還 十三年三月復議征麓川王驥以
原官總督軍務授宮聚平蠻將軍印率張軌田禮
方瑛等統漢土兵一十二萬至雲南十二月兵抵

金沙江賊柵西岸以拒驥命構浮梁亘千數百尺
麾兵悉渡一鼓破之賊斂衆保鬼窟山立三大寨
驥乘勝進攻皆拔之又破芒崖山各寨踰孟養至
孟那而還諸酋皆震怖謂自古漢人無至此者然
思機思卜竟失所在或謂死於亂兵夷衆復立思
任幼子思洪為主以狀來言緬不能撫其人民願
立思氏永當差發時兵力已疲因許之礮石金沙
江與洪誓曰石爛江枯爾乃得渡遂班師

景泰五年緬執思機送京獻俘誅之

正德二年雲南屬夷阿本叛巡撫吳文度討平之七年十八寨夷人出降巡撫洪遠安撫之

嘉靖七年尋甸土酋安銓反初仁德府土官安詳安廼屢亂降為馬頭改尋甸設流官至是知府馬性魯因徵糧繫馬頭安銓妻於獄裸撻之銓遂叛掠嵩明等處進攻尋甸分守叅政黃昭道兵備副使周全督兵與戰敗績遂陷尋甸執知府雲南鎮巡

調各土司兵赴討令武定酋鳳朝文守廠江八年春武定土酋鳳朝文反朝文素與安銓通銓妻又鳳氏也遂自廠口擁兵叛還攻武定陷之殺同知袁俸知州秦健等官十三人遂與銓連兵二萬於會城西北門外焚軍民房屋雲南大擾事聞命兵部尚書伍文定自京師出征按察使徐瓚議調各土司兵與衛軍協力勦撫朝文等戰不勝欲奔東川霑益州營長輔祐追獲斬之安銓亦為其下

阿志所獲五月文定至雲南奉旨處置未盡事宜
數月乃還 十七年四月勅雲南鎮巡會討安南
時安南莫登庸父子逐其主篡位上命咸寧侯仇
鸞討之兵部尚書毛伯溫叅贊軍務雲南巡撫汪
文盛以蒙自縣蓮花灘當交廣水陸衝遣兵處其
地以為來歸人聲援 十九年六月毛伯溫等至
廣西徵集各省兵并檄雲南守臣集兵候師期議
雲南兵於蓮花灘分三哨哨各兵二萬一千人以

副使倪象賢等監督布政使胡宗明等督餉時黔
國公沐朝輔巡撫汪文盛經畫既定馳檄安南臣
民諭以大義又諭登庸父子果能納款歸命亦待
以不死而伯溫等駐師近邊登庸聞之大懼遂面
縛詣軍門降 三十年元江土酋那鑑反巡撫石
簡督兵往剿鑑詐降請官撫諭簡命左布政使徐
樾往諭為所殺事聞奪石簡官切責黔國公沐朝
弼令戴罪殺賊 三十二年巡撫鮑象賢奉命討

元江賊那鑑鑑自殺 三十六年易門縣夷李向陽與土縣丞王一心作亂稱混天大王以普文為軍師構黨七千人分佈四掠一心復與武定阿倫通阿倫者鳳朝文養子也朝文既誅其妾瞿氏撫幼子守土盡職後子死子妻索林復署府事而瞿氏有外行忌其婦阿倫潛謀奪嫡挾貲赴京納級指揮使名鳳繼祖陽稱已襲武定知府與馬冠帶以歸土人附之遂逐索林巡撫教宗慶奏請討之

阿倫潛奔四川會理州招集亡命誘索林與講好
殺其總管鄭竑等七十人出富民羅次界抄掠又
分遣東川營長阿科等兵攻曲靖尋甸諸府 四
十四年新撫呂光洵至雲南討李向陽誅之復調
各土官兵分路剿武定移檄黔蜀巡撫舉兵接應
遂破諸夷阿倫北遁兵備僉事張澤追之被執光
洵合師急攻賊勢窮挾澤求撫不許死之九月光
洵自率師追阿倫至會理州斬之并誅王一心等

萬歷元年大姚鐵索箐力些夷叛巡撫鄒應龍同黔國公沐昌祚討之七十二村悉平 二年二月鄒應龍沐朝輔移兵東征臨安王弄山毋撲等夷平之 八月征蕎甸等夷平之 四年十二月緬酋莽瑞體結諸蠻作亂先是嘉靖初孟養思倫擊緬破之殺其宣慰莽紀歲紀歲子瑞體奔洞吾母家後據其地吞併鄰境木邦土舍罕拔潞江安撫線貴皆附之因遣使招隴川多士寧士寧不從其養

子岳鳳毒殺士寧以應之士寧妻罕氏懷印攜二
子多忠多孝奔永昌當事不能救令歸岳鳳襲殺
之遂據麓川罕拔復誘干崖宣撫刀怕舉之弟怕
文附緬怕文不從與戰兵潰奔永昌罕拔取干崖
印令怕舉妻罕氏收掌罕氏罕拔妹也并遣人助
守其地金騰兵備副使許天琦憤諸夷附緬遣指
揮侯度持檄招諭至迤西頭目思箇從違未決因
刻木二一書天皇帝號一書莽瑞體號率衆拜之

乃卜則天皇帝者卓立几上莽瑞體者傾墜於地
由是決意向中國瑞體惡其倡諸夷內附大發兵
攻之思箇告急時天琦已卒署事副使羅汝芳檄
調漢土兵赴援師至騰越思箇潛令頭目領兵萬
餘於阿瓦地絕緬糧道自督兵伏於戛撒誘緬兵
入截其歸路請援兵自隴川邀其後迤西兵衝其
前又令水兵開江上石閘以衝潰緬舟計定緬兵
果入戛撒思箇堅壁不與戰伏乞塞險隘絕糧道

以俟中國援兵至首尾共擊之久之緬兵困饑甚
以撮金易合米始屠象馬既剥樹皮掘草根軍中
疫作死者山積瑞體懼請與思箇和思箇不許復
遣使速援兵無何有入賀行者恐為兵興阻移書
同事合文止援汝芳不聽乃合揭於巡撫以兵興
禍連語怵之巡撫王凝馳檄止汝芳兵不得發思
箇困緬月餘望援兵不至岳鳳知之乃集隴川夷
兵二千兼程援緬導之由間道遁去迤西知緬走

率衆追之緬兵大敗生還者十不一二 五年廣
南儂酋叛巡撫王凝會黔國公沐昌祚撫定之
七年莽瑞體復率兵象侵迤西報戛撒之怨中國
無援思箇敗奔騰越中途為奴郎都等執送瑞體
不屈遇害瑞體遂盡據迤西目兵奔永昌稍安置
於內地 十年十月岳鳳領緬兵襲破干崖土婦
罕民降於緬時莽瑞體死子應裏嗣岳鳳執遮放
頭目刀落思送應裏又啖應裏殺罕拔拔有子名

進忠應裏欲併其地遣弟應龍伐之自率兵從以
灣甸州景宗真為鄉導追進忠進忠奔內地應龍
躡之遂入姚關十一年正月應龍焚掠施甸進
攻順寧二月破猛淋寨防守指揮吳繼勲千戶初
維垣皆死之是年冬千崖刀怕庚雷弄廖元伯南
甸刀落憲蓋達刀思定皆陷於緬巡撫劉世曾巡
按董裕會疏請兵以南京坐營中軍劉綎為騰越
遊擊移武定叅將鄧子龍為永昌叅將各率募兵

五千赴援副以土兵應裏亦西會緬甸孟養孟密
蠻莫隴川兵於猛卯東會車里八百孟艮木邦兵
於猛炎復併衆入犯姚關子龍為壘靜待大破之
於攀枝花地斬宗真劉綎率兵出隴川猛密直抵
阿瓦頭目莽灼及猛密思忠蠻莫思順皆降初綎
破隴川以岳鳳有心計厚結之以招諸夷許不死
故猛哈思化迤西思威木邦罕鳳等俱殺緬使詣
綎降進忠亦集其餘衆來奔諸夷望風內附者踵

至當事不知日促綖禽岳鳳綖不得已執鳳及其子曩烏等俘解京師諸夷多復叛十三年羅雄州土酋者繼榮叛劉世曾沐昌祚斬之莽應裏陷迤西思威屬部密堵送速二城思威謀復之使來求助遊擊劉天俸募兵五百往陣斬緬目多曩長遂復二城金騰兵備李材上其事劉世曾以聞陞材右僉都御史巡撫鄖陽尋下巡按御史蘇鄴覆覈時在陣多土兵不知取級既而復往則已腐

爛遂以冒功覆奏逮材天俸俱下獄並削劉世曾
籍論者寃之 十六年四月永昌姚安營兵鼓譟
索餉刳同知為質抄掠抵省巡撫蕭彥伏兵擊之
殲其魁餘黨平 九月應裏攻猛密罕烘率其孫
思禮從子思仁奔猛廣猛哈思化復進奔蠻莫據
之罕送率其子思華奔騰越 十八年應裏進兵
孟養以報密堵送速之怨遂破孟拱十一月應裏
破猛廣罕烘思禮奔隴川思仁奔雅益 十九年

應裏圍蠻莫鄧子龍率兵至卜羅思莊緬退去

丁苴白改夷普應春等叛撫鎮吳定沐昌祚討平之二十年思仁叛犯隴川隴川宣撫多思順有備弗克逞乃同丙測奔緬應裏偽立仁於猛密當事者移置罕烘思禮於芒市九月應裏令阿瓦迤西犯蠻莫思化等奔等練山叅將鄧子龍率兵營等練緬兵屯遮敖子龍發兵擊之大戰於控哈緬退屯沙洲大兵無船不能進相持彌月緬尋退去

二十一年十二月應裏遣允墨率兵入據蠻莫
思化敗走墨等分道內犯並出隴川多思順奔猛
卯 二十二年春巡撫陳用賓出駐永昌聞賊大
入乃分部以叅將王一麟奪等練中軍盧承爵出
雷哈都指揮錢中選張先聲出蠻哈守脩張先蔭
出打線一麟擊其前承爵中選擊其左右為賊所
誘鼓行而前伏發官軍被截後二營相繼退奔監
軍同知姚允升收殘軍晝伏夜行望等練諸山火

光知賊已焚巢退去因稱勝而還緬竟取道隴川
猛卯多俺實導之多思順怨俺乃糾思化并芒市
多泰等擊俺殺其子多荒 十二月多俺糾思仁
丙測由猛卯襲遮放官兵戰卻之巡撫陳用賓以
緬數入犯築八關於騰衝之邊每四關設一守備
戍之又募習夷路者閩人黃襲使暹羅約其王得
楞内外夾擊緬多俺自遮放敗還不復歸猛卯投
木邦據曩義山永昌同知漆文昌計授木邦罕欽

令禽之謀洩俺欲奔罷古欽追及於雷聲并其子
多烘多曩斬之 二十四年二月築平麓城於猛
卯大興屯田是時邊事旁午餉費不貲猛卯古麓
川地阡陌膏腴多俺既死無主乃議以營兵任屯
非營兵而願屯者聽 十月緬遣思仁丙測等寇
蠻莫思化求救叅將吳顯忠率兵擊走之斬丙測
二十五年大侯州土官奉赦與弟奉學相攻殺
奉學女夫順寧土官猛廷瑞興兵助奉學陳用賓

遣叅將吳顯忠往討廷瑞圍急乞降巡道李先著
令禽奉學自贖廷瑞乘間遁入觀音山勢復振顯
忠再集兵攻之誅奉學執廷瑞送軍門坐先著以
受賄縱賊下獄死人咸寃之 二十六年諸蠻皆
絕緬入貢孟養思輶亦棄緬來歸 二十七年緬
攻思輶檄各土司禦之緬潰歸 九月順大丕輶
猛思賢等叛陳用賓同沐昌祚討平之 二十八
年矣堵十三寨莽亢等復叛陳用賓等再討平之

順大始定 命雲南撫鎮協討播酋楊應龍巡撫
陳用賓駐曲靖黔國公沐畎駐霑益遣叅將謝崇
爵等至烏江與賊戰勝之俄而賊兵數萬掩至遂
敗還橋折一軍皆沒總督李化龍以賜劍斬崇爵
二十九年蠻莫思化子思正乘多思順之喪襲
隴川 三十年阿瓦雍罕攻思正木邦罕拔子罕
謚率兵從之正奔騰越當事殺正以止兵 三十
二年緬攻猛密徵兵於思轟叅將王廷光止轟無

發轟從之縛獻其使緬怒攻轟轟走死都司王萬
年救之不及酋長思華據其地 三十三年陳用
賓遣副將陳寅禽緬目多罕復蠻莫界 三十五
年武定夷阿克反先是阿克有馬頭四十八人鄭
舉獨稱豪有力且富于財知府陳典以廉訪收禁
之舉以兼金置魚腹中饋典獲免已而復收之如
是者再四舉惡其無厭乃與阿克等攻破府城殺
指揮金守仁千戶王應爵男婦四百五十餘人千

戶梅應時等力戰死

事詳忠烈

十二月阿克鄭舉擁推

官白明通以兵隨其後直抵會城竟無一卒迎戰

明通至城下請以冠帶印信給賊不許明日賊從

北門外遶西南而東分道四掠沿村鎮市焚劫一

空時陳典以入賀在會城賊索其印甚急許之乃

去又明日復來鎮撫不得已以印絕與之始拔營

歸攻元謀和曲諸城未一月陷一府三州四縣會

尋甸夷目大理保楊禮亦屢被官司責辱結連夷

目招補阿白者色及夷婦海冲等叛攻破嵩明署
印知事李性先棄印逃吏目韋宗孝學正龍旌死
之賊進逼楊林都司汪如淵率土司祿崇功李鳳
兵赴救賊退歸攻尋甸殺指揮諸藩裕等巡按御
史周懋相候代駐曲靖調霑益土司安紹慶兵檄
同知孫台監督自嵩明追賊尋甸屢戰皆捷三
十六年正月左布政使彭應時叅政楊俊臣副使
陳綬都司范繼斌等率兵分剿阿克鄭舉是月賊

破祿豐知縣蘓夢暘死之六月諸路合兵剿賊阿克等奔東川官兵壓其境土司祿哲縛阿克鄭舉獻軍前左布政彭應時復禽其黨鄭文鄭宗舜叅政楊俊臣率廣南儂兵亦擊敗海冲等得嵩明州各印信惟武定印竟失所在副使羅希益同都司汪如淵督安紹慶兵斬楊禮子成俘妻妾三口遊擊段辰禽楊禮妾及子三人兩路賊俱平俘阿克等九名於京致仕黔國公沐昌祚疏論失事狀語

及其子獻詔逮獻及巡撫陳用賓都司張名世武
定知府陳典推官白明通祿勸知州黃榜元謀知
縣毛文彬俱下獄 三十八年隴川土司多安明
叛入緬巡撫周嘉謨檄兵備副使黃文炳追斬之
四十一年二月水西土酋安堯臣與霑益土司安
紹慶以讐構兵堯臣率兵入霑益殺傷甚衆周嘉
謨具奏行滇黔兩省會問 四十八年建水土酋
刀春琪勾交趾兵入犯攻破五邦等地王弄土舍

沙源率衆堵截勝之斬其僞侯伯三人

天啟元年九月四川永寧土酋奢崇明奢寅貴州土舍安邦彥相繼反兩省羽書交至徵兵於雲南十月巡撫沈儆烝調隘省土兵於曲靖以副使黃士華監紀分道赴援十二月都司李天常率援黔兵四千人至安南衛水西賊將羅應奎僞降誘至疊水舖伏發全軍皆沒天常死之二年正月都司楊明廷將三千人援蜀時烏撒土酋安効良先與

邦彥通陷烏撒衛殺指揮管良相明廷兵至畢節
効良伏兵阻截明廷戰敗死之 二月霑益土婦
設科及土目補鮓柰科李賢期曲等俱叛霑益倘
甸松林炎方交水白水六站堡俱不守併陷平夷
衛殺官吏武定夷目張世臣糾小東川賊千餘攻
陷他頗補知二堡沈儆炳以便宜起叅將李思忠
督兵守武定張世臣來攻思忠與戰大敗之世臣
遁東川土酋祿千鍾復反與霑撒土賊合攻嵩明

知州王育德率軍民固守儆矧便宜起叅將袁善
督守備金為貴土司沙源等馳救擊走之是時寧
州土司祿永命阿迷土司普名聲石屏土司龍在
田武定土司吾必奎等俱以巡撫檄率調土兵從
征力戰有功設科等復入陸涼州境焚劫各鄉知
州郭俊義戰敗被殺 四月叅將尹啟易守備李
加培周嘉映自交水督兵進霑益安効良率水烏
賊至霑拒戰官軍陷沒加培嘉映俱戰死 七月

亦佐營長安應龍引賊補鮓等陷亦佐縣八月寇
越州衛九月圍羅平州三年正月新撫閔洪學
至滇遣兵攻羅平復之安應龍走霑益洪學復分
遣袁善施翰李思忠沙源吾必奎等率兵討賊漸
次恢復五月水西普安賊攻平夷守將袁善擊
敗之遁去十一月兵備叅議王英叅將尹啟易
以計禽設科李賢誅之四年七月閔洪學檄武
舉官李瑗等率兵襲張世臣於他頗斬之武尋平

八月新化新平賊首魯魁魯克等伏箐刦掠地方閔洪學檄分守副使胡其慥遊擊劉崇禮搜捕俘斬餘黨悉降立十二哨於其地戍之五年三月烏撒安効良復叛先是設科李賢張世臣等已誅檄安効良縛獻安應龍以自贖効良持兩端見賊勢衰陽為恭順遂以應龍首及烏撒衛所各印來獻勞其使而歸之行至曲靖遇盜被殺會黔撫王三善為安邦彥黨陳其愚所詐被害於大方道

中水西賊勢復熾効良因以殺使為辭合邦彥崇
明等共為三十九營直抵霑益袁善督沙源等力
戰五日夜卻之吾必奎堅守災方以老賊衆袁善
乘勝間出與必奎內外夾擊復大敗之賊遁五月安
効良復糾水西入寇閔洪學檄布政使謝存仁及
袁善等大敗之於馬龍州賊由尋甸遁回假道東
川東川奉巡撫檄以木塞路不得通有阿遣馬頭
竜戈資者為之鄉導從山路遁歸烏撒事平重犒

東川購獲黠戈資誅之

崇禎三年黔國公沐天波巡撫王伉巡按甘學濶屯
兵曲靖剿安効良設科餘黨雞世昌平之四年
王伉統滇黔蜀土司吾必奎等屯兵臨安以討阿
迷土酋普名聲初名聲為馬者哨哨頭水烏之亂
與沙源吾必奎等俱奉調率兵破賊有功既而隨
御史傅宗龍援黔及宗龍以內艱歸名聲亦回授
阿迷土知州日益驕蹇後巡按御史趙洪範至臨

安名聲率兵逐之戈甲旗幟列數里洪範惡之貽
書巡撫王伉謂其養癰伉亦習聞名聲不法時寧
州土官祿滉與名聲互訐人傳伉欲剿名聲名聲
懼乃詐為祿土官家人訴名聲于伉以覘虛實伉
果有即討之言名聲遂反伉奏請檄調黔蜀兵會
討以右布政使周士昌監軍擊名聲敗之進圍阿
迷名聲使人以重賄誘吾必奎復使其下偽約降
王伉遣名聲故交莊承差往諭名聲留之佯使人

告急且密語左右曰官兵四至皆不慮但從某箐
入甚為可憂莊得名聲語歸告伉伉不知為計遂
遣將朱永吉往攻某箐伏發必奎賣陣先走全師
皆陷士昌歿於陣永吉亦力戰死名聲犯臨安叅
將溫如珍卻之事聞逮王伉及巡按趙洪範時名
聲雖戰勝仍巧詞乞撫當道懲前事不復置討總
督朱燮元至自黔以兵威撫定焉 五年普名聲
死初名聲叛其兵頭何天衢不從反正自効名聲

移兵攻之中砲死其妻萬氏擁衆據阿迷州與沙源諸子定海定洲通招定海為贅壻已復殺定海而贅定洲六年巡按姜思睿議撫萬氏所遣輒被殺廣西知府張繼孟單騎入賊營諭以利害萬氏遂降

本朝順治二年九月元謀土酋吾必奎反初必奎之先為元謀土知縣久絕不嗣至必奎以戰功得官仍居故地自阿迷賣陣後桀驁益甚會黔國公沐天

波遣叅將李大贄屯會川以防流寇大贄數侵擾諸夷必奎不能堪至是遂聚衆反陷武定祿勸楚雄諸郡縣天波調各土司從大贄進剿十月大贄與土司祿永命龍在田擊破必奎禽斬之元謀平十二月安南土酋沙定洲反初定洲既贄萬氏兼有安南阿迷之衆復併吞夷地南至交岡及吾必奎反天波調定洲赴剿逗留不進必奎已伏誅定洲始至留屯省城外不肯歸聞天波家饒富足

定洲心動陰結其左右為內應以是月朔入城辭
行率衆襲天波時變起倉卒天波由小竇出西城

太夫人陳氏夫人焦氏俱自焚死

事詳列女

天波遂奔

楚雄定洲因盡得沐氏所有據省城刦巡撫吳兆
元為題請代天波鎮滇又至祿豐執家居詹事王
錫袞置貢院脅之與兆元傳檄各州縣旋聞天波
在楚雄自率衆追之是時楚雄新為吾必奎所破
金滄道副使楊畏知奉調監軍至楚雄人留之畏

知遂駐楚聞定洲西出與天波計守禦之具未集
曰公在楚賊以全力聚攻城必破公不如西走永
昌使楚得為備賊即西追恐楚襲其後留攻楚又
恐公從西來首尾牽制上策也天波從之定洲至
楚雄門閉不得入為畏知所紿遂去遣其黨王朔
李日芳等分攻大理蒙化陷之屠殺以萬計又圍
武定推官陶光印固守攻四十餘日乃去 三年
定洲復攻楚雄時賊恐畏知截其歸路又聞迤東

祿永命龍在田等各自守因不敢至永昌撤兵還
竭力攻楚雄楚雄守具已集屢攻不能下畏知視
賊懈輒出奇兵奮擊前後所殺甚衆圍數月賊稍
稍引去東攻石屏石屏守堅復回攻寧州破之

四年正月沙定洲復攻楚雄時定洲既陷迤東諸
郡縣又引兵而西分為七十二營每七營各為一
大營統之環楚雄鑿濠三重為久困計畏知竭力
固守經八十餘日糧盡援絕幾不能支會流寇張

獻忠死餘黨孫可望李定國劉文秀艾能奇率殘
兵由遵義入貴州龍在田使人告變且勸其至滇
可望因詐稱黔國焦夫人弟率兵來復仇三月可
望等入滇賊撤兵往援曲靖乃解圍去 孫可望
等破曲靖及交水俱屠之執巡按羅國嘯聲言欲
搗定洲巢穴分兵出蛇花口定洲時自楚雄還省
城聞之大懼遂殺故詹事王錫衮於貢院焚南城
樓遁走臨安可望知定洲走即由陸涼宜良趨省

據雲南 五月孫可望分遣諸將徇迤東諸郡劉
文秀屠武定李定國屠臨安還至晉寧鄉兵拒之
復屠晉寧昆陽呈貢歸化 八月孫可望自率兵
逼迤西楊畏知禦於祿豐之獅子口兵敗被執可
望聞其名不殺誘降之畏知曰果爾從吾三事一
不用獻忠偽號二不殺百姓三不虜婦女可望皆
許之即執箭對誓迤西得免屠戮畏知之力也時
沐天波在永昌可望至大理以書招之天波遣子

報命可望厚待天波子陰使劉文秀隨之疾馳至永昌會天波於北城樓遂攜之同楊畏知等俱至省五年八月李定國禽沙定洲及萬氏初定洲走歸臨安屯兵俾革竜與萬氏分險自守其下湯嘉賓陳長壽等各據一山立營相去數十里為犄角之勢私通交趾借其援以固結蠻心一日偶集於嘉賓營定國偵得之率兵遽至圍以木城困守三閱月絕其水源諸蠻懼出降者相續遂械定洲

萬氏等數百人回省磔於市 六年六月姚安舉
人席上珍起兵討可望被執不屈死之 九年二
月大師取廣西明宗室由根奔廣南可望安置於
安籠所初可望既禽沙定洲自以無名爵難於號
召滇黔聞由根稱偽號廣西遣使請封乃偽封秦
王尋以偽將軍賀九儀譖執楊畏知殺之至是由
根奔廣南可望安置於安籠吳貞毓等從由根謀
通定國以圖可望值定國在廣西不能旦夕相援

可望知之遣人殺貞毓等十餘人十四年可望自貴州舉兵入滇先是李定國由廣西還可望聞之遣其將白文選欲先挾由根入黔文選至安籠適定國至遂與合謀送由根入滇文選回可望欲殺之既而釋之至是舉兵復以文選為總統九月李定國劉文秀逆於曲靖之三岔口文選夜率其本部降定國可望大驚欲回兵諸將力爭乃止可望遂密遣馬寶武大定張勝由尋甸間道襲省城

潛通其心腹王尚禮為內應自領重兵與定國相
持可望將馬進忠以其事密報定國定國與文選
疾擊之可望大敗走時馬寶武大定亦密受由根
劉紹張勝不由間道反出楊林至則舉火省城及
曲靖皆知之悉嚴兵以待勝至省城絕內應又聞
可望敗遂焚掠而逃為定國所禽馬寶等同入滇
十月可望還貴州旋赴長沙經畧閣部洪承疇
軍前歸誠

詔封義王 十五年

命安遠靖寇大將軍信郡王鐸尼由貴州征南將軍固
山趙布泰由廣西平西王吳三桂定西侯墨勒根
下都統李國翰由四川三路取滇李定國白文選
等連營於安籠所七星關繞其後定國等潰敗同由根
自水西潛度七星關繞其後定國等潰敗同由根
走迤西十二月大師三路會於曲靖迤東各郡皆
歸附 十六年正月朔大師抵雲南二月兵進迤

西追殺王國勲於普洲又敗白文選於玉龍關由
根至騰越州李定國復集兵於磨盤石樹柵扼險
死拒大師趙布泰吳三桂力戰破之李定國走孟
艮由根走緬甸白文選走猛緬 三月偽將狄三
品等投誠禽偽慶陽王馮雙禮來獻奉

旨優叙三品等赦雙禮赴京安置 六月

命洪承疇至滇南議進緬機宜招撫流民偽將王會等
率屬歸降景東蒙化麗江姚安北勝鶴慶定遠楚

雄永昌鎮沅并四川烏撒東川烏蒙鎮雄等土司
悉後先歸附 九月元江土酋那嵩偽總兵許名
臣暗通李定國叛鐸尼吳三桂討平之并獲沐天
波之子忠顯 十月偽將李如碧馬寶楊國明等
悉降 十七年正月

命吳三桂為總管移鎮雲南 十八年正月李定國攻
緬甸緬酋請救吳三桂發永昌騰越等處防邊兵
遙應之 四月昆明妖人張錡尹士鑣梅阿四等

謀叛伏誅 五月定西將軍愛星阿公至滇大師
凱旋十一月愛星阿公吳三桂領滿漢兵入緬師
至木邦分兵追白文選於茶山降之并降其黨萬
人

康熙元年正月緬酋殺明宗室及沐天波等數百人
大師次緬遂獻由根 八月李定國死於景線其
偽將馬思良胡順都王道亨以定國子嗣興及劉
文秀子震來降衆悉平愛星阿公等班師 三年

吳三桂請討水西土酋安坤安如鼎等兵次水西
坤等負固久不下三桂計禽如鼎坤走烏蒙烏撒
追禽之斬於市明年水西等處悉平 四年三月
迤東土酋寧州祿昌賢新興王耀祖嵒峨祿益王
揚祖王弄王朔蒙自李日森李世藩李世屏八寨
李成林糾合納樓普率教化張長壽枯木龍元慶
倘甸葉向陽葉正昌石屏龍韜龍飛揚路南秦祖
根陸涼資洪彌勒昂復祖維摩沈應麟沈兆麟王

承祖王義王先任王先倫等謀叛衆至數萬攻臨
安陷蒙自嵒峨寧州易門圍彌勒通海石屏宜良
等州縣各郡震動總督卞三元巡撫袁懋功提督
張國柱發兵討之吳三桂自水西遣王輔臣援彌
勒趙得勝援石屏賊遁四月吳三桂自烏蒙回師
次第剿嵒峨新興易門等賊七月卞三元張國柱
吳三桂分剿蒙自新興邱北等處克之禽王耀祖
祿昌賢王朔張長壽李成林李世藩李日森沈應

麟龍元慶儂得功悉誅之

詔撫其餘黨李世屏普率勢窮來降悉寬其死迤東悉
平 九月蒙古侵據麗江府屬中甸地西番二寶
法王哈馬臨清格丁等挈家來奔 十二年十一
月吳三桂反初三桂收蓄亡命久謀不軌適

命搬移家口逆黨胡國柱吳應期吳國貴夏國相郭壯
圖衛璞方光琛方學範等密畫於內馬寶力贊於
外張國柱高起隆王屏藩等應之殺巡撫朱國治

按察使李興元不屈械繫於獄雲南知府高顯辰
同知劉崑皆被杖安置復潛通貴州提督李本深
為接應雲貴總督甘文焜知勢不可為謀趨守鎮
遠扼賊咽喉以徵調援兵力圖恢復比至鎮遠而
副將姜義先已從賊文焜父子及筆帖式何善雅
圖皆死之三桂遂使吳國貴為前鋒徑寇辰沅至
荆江使王屏藩由蜀寇漢中夏國相寇江西又糾
廣西孫延齡馬雄廣東尚之信福建耿精忠同反

數省騷動

上命滿漢大兵討之賊不敢渡江既而四川兩廣次第克復三桂屯兵湖南搜括糧餉滇民困憊引領以望大師十六年吳三桂求援於蒙古割麗江江內喇普地賂之十七年吳三桂死於衡州十八年海朝龍起兵鶴慶田進學起兵永昌討吳賊不克朝龍敗由土番走京師進學死十九年大帥取貴州先是郭壯圖等因吳三桂死擁其孫世

璠進屯貴州以拒大師及定遠平寇大將軍貝子
章泰統征南將軍穆占鑲藍旗叅贊都統喇賽正
白旗前鋒統領薩克查巴圖魯正藍旗都統釋迦
保正黃旗先鋒統領陝納海鑲白旗副都統蟒紀
錄正黃旗副都統陶代鑲紅旗副都統花色正藍
旗副都統公圖正白旗副都統宜思孝正藍旗副
都統官保鑲黃旗內閣學士兼禮部侍郎薩海署
副都統盧崇峻綏遠將軍湖廣總督蔡毓榮江西

總督董衛國建義將軍林興珠貴州提督趙賴山
西提督周卜世等滿漢官兵由湖廣克辰龍關楓
木嶺取鎮遠清平破偽將軍韓天福於平越十一
月世藩遁回雲南二十年正月大師克盤江吳
世璠遣偽將軍線絨屯兵江西坡阨險以待章泰
大敗之賊分兵據黃草壩征南大將軍賴塔統正
藍旗叅贊都統勒貝正紅旗叅贊都統希福鑲白
旗叅贊都統馬齊鑲紅旗叅贊都統趙璉鑲藍旗

護軍統領額黑里鑲紅旗副都統洪實錄鑲白旗
副都統祖植椿兩廣總督金光祖福州將軍馬九
玉等滿漢兵由泗城州奪石門坎拔安籠所統出
賊後大破之二月賴塔至曲靖全城歸附線絨始
遁章泰遂會師於曲靖十九日師抵雲南吳世璠
遣郭壯圖悉精銳迎戰大師夾攻大破於呼馬山
下賊嬰城拒守大師圍之時滿漢兵數十萬方以
糧糗為慮巡撫伊闕布政使王繼文開誠遍諭安

集流移動餉召買萬姓踴躍晝夜輓運未幾伊闕卒於軍以王繼文為巡撫田啟光為布政使又

命學士佛倫侍郎金鉉等馳至軍中總理糧儲四月賊將馬寶自遵義由尋甸奔楚雄都統希福雲南提督桑格迎戰於呂合禽之時胡國柱王緒王公良李匡等復合潰衆於迤西夏國相高起隆廖進忠王永清等潛聚於廣南大師分路搜討胡國柱王緒李匡自殺禽高起隆等俘馬寶夏國相於京餘

悉磔於市迤西廣南平八月宣威將軍紀哈里同
副都統希福覺羅西布勇畧將軍雲貴總督趙良
棟由建昌渡金沙江鎮安將軍都統噶爾漢護軍
統領佟雅副都統得爾德翁艾署副都統張長庚
由永寧會師於雲南十月初八日大師移營逼城
賴塔進兵銀錠山蔡毓榮奪重關及太平橋穆占
趙良棟王繼文奪玉皇閣遂至東西寺章泰策應
賊悉力拒守王繼文遣人自鶴慶北勝運紅衣砲

至銀錠山晝夜攻擊賊大懼章泰等復書告示射
入城中諭以順逆賊皆有離心二十二日賊黨余
從龍吳成鰲出降趙良棟王繼文領兵攻得勝橋
蔡毓榮攻大東門林興珠攻草海賴塔攻銀錠山
並分兵攻近華浦四面逼城復遣余從龍入城招
撫二十八日城中賊亂線絨等擁兵入郭壯圖家
殺壯圖心腹郭得勝壯圖及其子宗汾舉火自刎
世璠亦自殺線絨吳國柱吳世基何進忠黃明等

開門出降城下之日兵不血刃隨磔方光琛方學
範於市斬世璠壯圖首級並戮吳三桂屍俱函送
京師三十日章泰遣穆占馬齊入城大兵分守各
門籍吳世璠家產以

聞二十一年以綏遠將軍蔡毓榮總督雲貴

命勇略將軍趙良棟回京定遠平寇大將軍貝子章泰
征南大將軍賴塔領滿兵暨楚粵山陝各路漢兵
陸續凱旋

命馬齊為鎮安將軍同護軍統領佟雅副都統得爾德
希福留鎮雲南 二十三年十月鎮安將軍馬齊
領滿兵回京 二十七年七月援剿左協兵丁任
二等作亂時楚省兵變副將廖貴一

陸見起行任二等遂狹黨噪叛欲肆刦掠奔合楚兵右
營遊擊宣起鳳力戰不支總督范承勲遣遊擊陳
勲麥良璽及曲靖鎮中軍遊擊張國勲等相機剿
撫賊欲出不意攻霑益州承勲預檄千總孫廷標

與宣起鳳內外夾攻賊黨潰散禽任二等誅之餘
悉令歸伍亂乃定 二十九年十一月新平縣土
巡檢李尚義誘集土夷數千大肆焚掠總督范承
勲檄臨元鎮總兵王洪仁援剿遊擊劉師周合兵
討之 三十年李尚義被禽自殺餘黨悉平 四
十五年九月奸民李天極等謀亂伏誅 四十六
年四月調官兵協剿貴州三江猺苗 五十七年
八月武定府撒甸土酋常應運等挾讐相攻總督

蔣陳錫遣官兵討禽之請設兵防 五十八年二

月

命都統五哥副都統吳納哈噶錫等領江寧杭州滿兵
二千名駐雲南先是準噶爾賊策妄阿拉布坦遣策
凌敦多布襲取西藏殺拉藏罕湯古忒及蒙古人
民驚惶奉

旨三路進兵至是五哥等赴滇駐劄以候會師進討

五十九年五哥吳納哈領滿兵二千名鶴慶鎮總

兵趙坤永北鎮總兵馬會伯領綠旗兵一千五百
名及麗江土司兵五百名進藏六月五哥等至查
木道會四川兵同將軍噶爾弼前進招撫結敦七
月攻取喇里禽藍占巴丹巴招撫工布竹貢八月
克取墨竹工卡等處策凌敦多布敗走遂復西藏
大兵凱旋留趙坤統綠旗兵三百名駐防 六十
年六月復

命五哥吳納哈領滿兵五百名進藏駐防副都統噶錫

領餘兵回江浙 六十一年六月總兵趙坤領綠旗兵自藏回雲南

雍正元年九月副都統吳納哈領滿兵自藏回雲南
旋回江寧 十月魯魁土賊方景明等聚衆數百人攻殺猓目施和尚總督高其倬遣遊擊李化龍領兵捕之景明等逃入土戛方四陳哈巴寨內復遣人招諭之景明及方四等出降 十二月苦苦腦兒羅卜藏丹津犯西寧邊界

命雲南提督郝玉麟領兵二千名駐劄查木道 二年
方景明黨普有才藏匿威遠土州尋逃入困堅箐
官軍追殺獲其妻子有才遁走陳哈巴又糾合裸
夷刼掠茶山一帶叅將張應宗等率兵進剿八月
陳哈巴為官軍追擊自刼死并斬其子阿班野賊
悉平 苦苦腦兒平提督郝玉麟領兵由查木道
回雲南 五年正月總督鄂爾泰發兵捕烏蒙土
府祿萬鍾鎮雄土府隴慶侯等時東川新歸滇轄

而烏鎮二土府與東郡接壤尚隸四川時行刼掠
藏匿奸宄為滇黔蜀邊地之患鄂爾泰親至東川
檄召萬鍾慶侯出鞫二酋竟不赴質各携印逃至
四川官兵追襲其後萬鍾慶侯俱就禽以二土府
地改隸雲南 滇沅夷賊刀如珍率衆作亂時鎮
沅初改土設流署府事威遠同知劉洪度初至如
珍等率賊衆數百人刼掠抱母井乘夜至府城焚
燬官廨刼課縱囚洪度被害總督鄂爾泰檄副將

張應宗領兵討之二月威遠猱黑老胖等結連鎮沅叛夷聚衆肆掠焚燬鹽倉總督鄂爾泰檄叅將邱名揚等領兵追剿前後禽斬三百餘人招撫千餘戶時新平江外土賊阿達烏圖白得等亦糾賊數千乘機仇殺楊土舍諸村寨直逼縣城聞大兵至乃遁三月生禽刀如珍等老胖阿達烏圖白得相繼就撫 四月茶山莽芝夷賊麻布朋等叛茶山為車里宣慰司所轄其舍目刀正彥素懷不軌

欲奪土司世職至是陰煽諸夷為亂總督鄂爾泰
檄叅將邱名揚等領兵進剿六月西藏噶隆阿
拉布巴等殺康濟鼎其康濟鼎下頭目坡羅鼎帶
兵報仇戰鬪相持

命雲南及川陝二省大員領兵往藏安頓料理開化鎮
總兵南天祥領官兵駐防查木道邱名揚遣守
備李定海捕莽芝賊擊走之復遣人招撫賊黨多
乞降麻布朋遁匿慢了慢五諸窩泥寨官軍捕之

窩泥助逆九月李定海兵至倚邦攸樂及江內各
山窩泥聚衆數千人刼奪糧運進圍官軍定海連
戰兩晝夜退至慢岡賊衆復自四山箐內衝截官
軍把總王朝選被害十二月邱名揚至蠻坡賊衆
拒戰奮擊敗之賊遁走總兵孫弘本親赴倚邦督
剿諸寨皆平廉知係刀正彥主使將誅之正彥逃
至九龍江外乃遣遊擊雷應萬赴橄欖壩禽捕

總督鄂爾泰發兵討法戛土酋祿天佑等初天佑

代其兄天祥為法夏土目擅殺東川兵懼罪詐死
以天祥妻沙氏管理其地天佑遂烝沙氏為妻私
造軍器謀為不軌至是復遣其子刼掠附近居民
鄂爾泰檄叅將魏肅國楊國華領兵分道進剿天
佑及沙氏屯集三岔口花椒園率賊衆拒敵殺傷
兵練官兵奮勇夾攻乃敗走 六年正月楊國華
攻克石城各隘魏肅國亦攻破花椒園祿天祐等
奔潰入九龍箐官軍進攻復遁入多額落莽芝

賊麻布朋就禽 二月祿天佑遁入老烏老雪山
箐為官軍所獲沙氏跳崖死 三月邱名揚遣將
弁追刀正彥至猛腊禽之時提督郝玉麟在茶山
橄欖壩李阿先等復叛統兵討平之 烏蒙米貼
土婦陸氏叛初四川磨坡長官司祿永忠早死妻
陸氏贅其夫兄永孝謀襲土職未就尋以其地改
隸雲南管轄永孝緣事執赴省獄有司并拘陸氏
抗拒不出至是副將郭壽域領兵三百往捕之陸

氏見官軍至藏匿箐中潛與頭目立之戶吞野鷄
固跨等謀刦營遣賊黨往四川吞都土千戶德昌
砦糾兵助逆於是月十二日攻殺壽域陸氏遁入
吞都井底壘總督鄂爾泰檄叅將哈元生領滇黔
兵討之并檄總兵張耀祖會兵進剿立之戶吞等
於各要隘口設滾木擂石據險拒守四月哈元生
領兵直抵吞都攻破蛇腰馬壘及門坎山五險屯
諸處殺賊數千人墮崖溺水者無算五月官軍追

陸氏至羊泥箐獲之并斬立之戶吞等野鷄固跨
德昌尋亦就禽時四川雷波土司楊明義密邇米
貼與陸氏世為婚姻賊黨多竄匿其地四川副將
張瑛檄明義赴營諭之不至其所屬部落復截刦
糧運殺傷官兵事聞

命四川提督黃廷桂統兵討之并

勅雲南總兵張耀祖領滇黔兵分路堵截鄂爾泰調兵
三千助之復令哈元生於江外防守 七月廣西

西隆州八達寨獍苗顏光色作亂總督鄂爾泰檄副將楊洪領兵赴粵助剿八月顏光色為其下所殺持首出降八達賊寨皆平楊洪等兵回雲南

九月四川兵禽楊明義叅將哈元生等撤兵回時四川阿驢土司阿資年幼不能約束夷人然頗效恭順哈元生之赴江外也留之行營候調阿資母見其子久不歸疑有變又聞元生以事鞭撻其頭目乃與阿資妻父拖科覺過等謀襲官軍是月二

十二日元生還至阿驢賊衆突出圍之數重千把
總死者四人兵亦多被傷殺元生力戰潰圍出總
督鄂爾泰調諸營兵會川兵往剿賊衆負險拒敵官
軍奮勇攻破諸巢穴拖科覺過等俱就禽梟斬

七年正月西藏平總兵南天祥領兵回雲南八
年八月烏蒙夷賊祿萬福叛先是土府祿萬鍾以
事當按訊其季父祿鼎坤覬得代襲其職率子萬
福萬貴首先來歸凡所調遣無不用命及事平改

土設流授鼎坤守備赴都引

見鼎坤失望臨行與其子及頭目數十人密約在烏伺
間倡亂會東蒙鎮總兵劉起元撫馭不善萬福等
遂於是月二十五日集賊衆數千圍府城復引四
川涼山蠻數萬踵至遊擊劉崑馬秉倫等力戰死
起元潰圍出亦被殺於荔枝河符印皆失其他文
武官弁及家口死者甚衆大關魯甸一帶悉為賊
盤踞總督鄂爾泰調滇黔漢土官兵分道進剿檄

安籠鎮總兵哈元生總統威寧一路中軍副將魏
翦國總統東川一路并趣雲南提督張耀祖赴功
山居中指畫九月烏賊分掠永善縣吞都土舍木
谷四哥乘釁殺阿興土千戶安永長鎮雄州逆目
施額法漏亦聞風蠢動起於奎鄉叅將韓勲連擊
破之又有刷刀等以逆書要約故土府隴聯嵩妾
二祿氏為亂二祿氏不從飛馳各寨諭以順逆賊
黨解散刷刀旋亦就禽鎮雄始得無事是月十一

日東川土酋祿良珍祿承爵通於烏賊焚掠村寨
進逼郡城魏肅國屢出兵擊之賊勢轉盛道路阻
梗郵遞不通肅國遣人開行赴省請兵鄂爾泰飛
檄楚姚鎮總兵官祿往援提督張耀祖分兵策應
二十一日哈元生領兵至得勝坡賊衆二萬餘迎
敵奮擊敗之明日復戰元生臨陣親射死夷目二
人官兵乘之餘賊大潰時官祿聞東川賊衆恇怯
不前鄂爾泰連檄趣之始於二十八日進東川旋

下令閉塞四門堅守不出會大軍雲集搜捕各寨
夷賊逃竄東川路乃得通十月初八日哈元生同
副將徐成貞自得勝坡進兵至以那遇賊二萬餘
元生與成貞夾擊斬賊數千人遂由稻田壩過松
林直抵烏蒙恢復府治隨遣將於牛欄江邊監造
木筏以待東川兵至會剿十一月遊擊王先領兵
渡江至魯甸適遇哈元生遊巡兵為夷賊數千人
圍困內外夾擊大破之時所檄四川兵已抵豆沙


關而韓勲既連破鎮雄夷賊復進抵伐烏關為川
兵應援偵知大關賊尚衆分三路奪其砦柵諸賊
奔潰遂復大關川兵亦於前一日攻克小關因會
滇兵搜箐殺獲無算大關既復韓勲遣將進取永
善哈元生亦檄貴州副將劉朝貴搜剿凉山一帶
約至永善會合時四川遊擊王谷宰領兵自井底
過江轉戰而前斬賊二千餘級亦抵縣城十二月
哈元生攻破鼠壘獲東蒙鎮印信鄂爾泰令徐成

貞署理隨捕禽賊首祿萬福叅將南天章亦先後
搜獲祿良珍祿承爵等東蒙悉平時祿鼎坤已授
河南歸德營叅將押解赴滇究訊得實與萬福良
珍等俱伏誅軍功陞賞有差逮官祿下獄 九年

九月

命發雲南兵一千名駐防查木道先是查木道原駐雲
南兵一千後議泰寧駐兵二千已足遥應西藏遂
撤回至是以馬臘奏稱查木道係通藏之要路且

與滇省相近仍遣雲南兵一千前往駐劄



雲南通志卷十六下